



02. februar 2010

UPA 2010/35

Inatsisartut Suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiuppara.

**Illuutinik niuernermi immikkut erseqqissunik maleruagassiisuusumik inatsimmik Naalakkersuisut suliaqaqqullugit Inatsisartut aalajangiiffigisassaattut siunnersuut.**  
(Inatsisartunut ilaasortaqa Olga P. Berthelsen, Inuit Ataqatigiit)

### **Tunngavilersuut:**

Ukiuni makkunani illunik tuniniaaneq ingerlanneqaqaaq. Pingaartumik illoqarfinni annerusuni ilaqutariinnut illut, illut affarleriit, piginneqatigiilluni inissiat pigiliussatullu inissiat tuniniarneqarneri pisiarinqartarnerilu aatsaat taamak annertutigisumik ingerlanneqalerput. Ukiuni aggersuni inuussutissarsiutitigut ineriartortitsinissaq eqqarsatigalugu tamatuma unikaallannissaa ilimanaateqanngilaq, akerlianilli annertusiartornissaa ilimanaateqarluni. Iimagisariaqarparput illunik niuernerup annertusinissaa, siullertut illoqarfinni annerusuni sumiiffinnilu allani pissammat.

Eqqumaffigisariaqarparput illunik niuernerup pingaartumik akit niuernerup nammineq aqutai tunngavigalugit ingerlanneqarmata. Tamatuma nassatarisaanik illoqarfinni akit qaffasilluinnartut atornerparput, sumiiffinni taakkunani inissaaleqinerujussuaq patsisigineqarajuttarluni, maannalu takusalereerparput illut inuit najugassaata akit qaffasilluinnartut piviusorsioortuunngitsullu atorlugit niuerutigineqartartut.

Tamanna ilaatigut patsiseqarpoq illunut pigisanullu aalaakkaasunut pisinermut inatsit (Købeloven) Kalaallit Nunaanni atuutinngimmat. Taamaattumik illunut akit piviusorsiuunngitsumik qaffasilluinnartut apparsarneqassappata, pisisullu inatsisitigut inissisimanerat pitsanngorsaavigineqassappat, taava Kalaallit Nunaanni illuutitut niuernerup iluani inatsiseqarnissaq erseqqaarissumik pisariaqartinneqarpoq.

Taamaattumik isumaqarpunga uagut inatsisiliortuusugut illunut inuit najugassaannut tunngatillugu atuisut annerpaamik illersorneqarsinnaanerat qulakkeertariaqaripput. Illunik niuernermut inatsisit maanna atuuttut naleqqukkunnaarput, inatsisiliortutullu inissianut tunngatillugu Kalaallit Nunaannut tulluarsakkamik naleqquttumillu inatsisiliortariaqarpugut, tassami Nunatsinni inigisatigut tuniniaaneq ingerlarsortorujussuvoq.

Taamaattumik Inatsisartut aalajangiiffigisassaattut siunnersuummi matumani kissaatigivara, Naalakkersuisut pisussaaffilerneqassasut illunut inuit najugassaannut tunngatillugu niuernermut immikkut iluarsisutaasussamik piaarnerpaamik Kalaallit Nunaannut atuuttumik inatsisiliortoqassasoq paasiuminartunillu malittarisassiortoqassasoq.

Siunissami inatsisiliuussassami illuutitut, inigisanut pigisanut, piginneqatigiilluni inigisanut il.il. niuernermi piumasaqaatit aalajangersarneqartariaqarput, aammalu pisinermi/tunisinermi aqqutissiuussinermut siunnersuinernullu aalajangersagaqartariaqarluni, kiisalu taarsiissutissanut

tunngatillugu akisussaaffimmut, piginnittut nikinnerinut il.il. tunngasutigut aalajangersagaqartariaqarpoq.

Aammattaaq toqqavimmut sanaartorfigisamut sanaartorfigineqartussamulluunniit atuisinnaatitaanermut pisinnaatitaaffik (brugsret) imaluunniit illumut pigisamut pisinnaatitaaffik (ejendomsret) pineqarnerseqqiseq erseqqissunik sukumiisunillu malittarisassaqaqartariaqarpoq.

Maanna nunaminertamut illuliorfimmu piginnittussaataangilagut, takusinnaalereerparpulli illoqarfinni annerni illunik tuniniaasartut professionaliusut (ejendomsmaeglerit) atuisinnaanermut pisinnaatitaaffimmik aningaasannortitsisartut, soorlulusooq nunaminertamut piginnittut pisinnaatitaaffeqartoqartoq. Illunik inuit najugassaannik niuertartut professionaliusut illut akiisa qaffakkiartortinnissaannut, taamatullu illunik tunisinerni aningaasatigut iluanaaruteqarniarnissami tamanna atorluarpaat. Tamanna akuerineqarsinnaangilaq pisisussanullu pisuussuteqanngitsunut ajorluinnarluni, taamaattumillu sammisap iluani erseqqaarilluinnartunik malittarisassaqaqartariaqarpoq.